

Penyertaan bukan Bumiputera dalam Kor Sispa masih rendah

Mohd Rafi Mamat
am@metro.com.my



MASTURA menyampaikan sijil pentaulahan pada Majlis Pentaulahan dan Perhimpunan Kebangsaan Kor SISPA Peringkat Kebangsaan Kali ke-12 di Universiti Malaysia Pahang (UMP) Kampus Gambang. FOTO MOHD RAFI MAMAT

Kuantan: Penyertaan bukan Bumiputera dalam Kor Siswa Siswi Pertahanan Awam (Kor Sispa) di instituti pengajian tinggi (IPT) masih rendah apabila kurang daripada lima peratus dalam setiap pengambilan.

Ketua Pesuruhjaya Angkatan Pertahanan Awam Malaysia (APM), Datuk Roslan Wahab berkata, faktor utama penyertaan yang rendah disebabkan kurang pendedahan mengenai agensi penyelamat berkenaan.

Menurutnya, setakat ini, sebanyak 96 hingga 97 peratus penuntut IPT di seluruh negara yang menyerai Kor Sispa terdiri penuntut Melayu dan Bumiputera.

"Kita akui bilangan bukan Bumiputera terlibat dengan APM masih rendah, dan kita melantik 30 hingga 40 peratus pegawai bersekutu di kalangan bukan Bumiputera sebagai langkah menangannya.

"Justeru, kita berharap pegawai bersekutu yang dilantik dapat menarik mahasiswa dan mahasiswi bukan Bumiputera menyertai APM kerana mereka diperlukan untuk membantu khususnya ketika menghadapi bencana," katanya.

Beliau berkata demikian pada sidang media selepas Majlis Pentaulahan dan Perhimpunan Kebangsaan Kor Sispa Peringkat Kebangsaan Kali ke-12 di Universiti Malaysia Pahang (UMP) Kampus Gambang, di sini, hari ini.

Majlis berkenaan dirasmikan Timbalan Menteri di Jabatan Perdana Menteri (Tugas-tugas Khas) Datuk Mastura Mohd Yazid.

Hadir sama, Naib Canselor UMP, Profesor Datuk Dr Yuserrie Zainuddin dan Pengarah APM Pahang, Che Adam Abdul Rahman.

Seramai 870 pegawai kadet Kor Sispa daripada 24 IPT dan satu Institusi Pendidikan Guru menerima pentaulahan sebagai Leftenan Muda.

Sementara itu, Roslan berkata, majlis pertaulahan Kor Sispa ini mampu memberikan pengiktirafan kepada usaha penuntut yang bertungkus lumus menyertai pasukan beruniform.

Katanya, ia adalah selari dengan lonjakan Pelan Pembangunan Pendidikan Malaysia yang mahu melahirkan mahasiswa seimbang dari segi akademik, kokurikulum dan insaniah.

Disiarkan pada: November 7, 2021 @ 8:20pm